



Broj: **02/1-50-8-22-19/25**

Sarajevo, 30. 1. 2025.

ZAPISNIK

19. sjednice Ustavnopravne komisije Doma naroda Parlamentarne skupštine Bosne i Hercegovine, održane 30. 1. 2025, od 14.30 do 15 sati

Sjednicu Ustavnopravne komisije Doma naroda Parlamentarne skupštine BiH (u daljnjem tekstu: Ustavnopravna komisija), održanu 30. 1. 2025, s početkom u 14.30 sati, u zgradi Parlamentarne skupštine BiH, u sali I/1, sazvala je Marina Pendeš, predsjedavajuća Ustavnopravne komisije.

Sjednici su prisustvovali članovi Ustavnopravne komisije: Marina Pendeš, Sredoje Nović, Kemal Ademović, Šefik Džaferović, Zdenko Čosić i Nenad Vuković, te Almir Kardaš, sekretar Ustavnopravne komisije Doma naroda, i Ivana Šeremet, stručna savjetnica u Ustavnoj komisiji.

Sjednici su prisustvovali i gosti, te predstavnici službi Parlamentarne skupštine BiH:

- Gordana Živković, sekretarka Doma naroda,
- Želimir Nešković, delegat u Domu naroda,
- Dubravka Bošnjak, ministrica civilnih poslova BiH,
- Davor Bošnjak, šef Kabineta ministrice civilnih poslova BiH,
- Dragoljub Reljić, direktor Agencije za zaštitu ličnih podataka u BiH,
- Akir Šišić, šef Kabineta zamjenika predsjedavajućeg Doma naroda,
- Ana Rašo, savjetnica u Kabinetu predsjedavajućeg Doma naroda,
- Sonja Abdulovski, stručna savjetnica u Ustavnoj komisiji Predstavničkog doma,
- Zoran Žuža, šef Odjela za informiranje,
- Maja Ribar iz Delegacije EU u BiH,
- Nina Šandrk iz Misije OSCE-a u BiH.

Marina Pendeš, predsjedavajuća Ustavnopravne komisije, otvorila je sjednicu i konstatirala da postoji kvorum za rad i odlučivanje.

Nakon toga, usvojen je sljedeći

DNEVNI RED

1. **Prijedlog zakona o zaštiti ličnih podataka, P.Z.E.I, broj: 01,02-02-1-2548/24 od 17. 12. 2024**, predlagач: Vijeće ministara BiH (postupak u nadležnoj komisiji – faza II, postupak u skladu s čl. 108 – 113, a u vezi s čl. 125. i 126. Poslovnika Doma).

Ad. 1. Prijedlog zakona o zaštiti ličnih podataka, P.Z.E.I, broj: 01,02-02-1-2548/24 od 17. 12. 2024, predlagač: Vijeće ministara BiH (postupak u nadležnoj komisiji – faza II, postupak u skladu s čl. 108 – 113, a u vezi s čl. 125. i 126. Poslovnika Doma)

Predsjedavajuća Ustavnopravne komisije dala je uvodne napomene o ovoj tački dnevnog reda. Istaknula je da slijedi druga faza u nadležnoj komisiji, te da su na Prijedlog zakona o zaštiti ličnih podataka podneseni amandmani.

Zatim je predložila da se prvo obavi rasprava i glasanje o amandmanima koje je podnio Šefik Džaferović. Prijedlog je jednoglasno prihvaćen.

Otvorena je rasprava u kojoj su učestvovali Marina Pendeš i Šefik Džaferović.

Nakon toga, uslijedilo je glasanje o podnesenim amandmanima Šefika Džaferovića.

Ustavnopravna komisija, s jednim glasom „za“, četiri glasa „protiv“ i jednim glasom „suzdržan“, nije usvojila Amandman I. koji glasi:

Amandman I.

U članu 8. stav (5) briše se.

Ustavnopravna komisija je jednoglasno je usvojila Amandman II. koji glasi:

Amandman II.

U članu 53. stav (2) riječi: „Odredbe ovog zakona uzimaju se u obzir“ zamjenjuju se riječima: „Ovaj zakon primjenjuje se“.

Ustavnopravna komisija je jednoglasno usvojila Amandman III. koji glasi:

Amandman III.

U članu 70. stav (1) tačka f), članu 71. stav (4), članu 73. stav (1), članu 102. stav (1) tačka f) i članu 107, kao i svim odredbama predmetnog zakona u kojima se propisuje „pravo na podnošenje pritužbe Agenciji“ treba zamijeniti „pravom na podnošenje prigovora“.

Ustavnopravna komisija, s jednim glasom „za“, četiri glasa „protiv“ i jednim glasom „suzdržan“, nije usvojila Amandman IV. koji glasi:

Amandman IV.

U članu 83. stav (7) iza riječi: „predlagač se može prethodno savjetovati s Agencijom“ zamjenjuje se riječima „dostavlja se Agenciji na mišljenje“.

Ustavnopravna komisija je jednoglasno usvojila Amandman V. koji glasi:

Amandman V.

U članu 99. stav (5) iza tačke b) dodati novu tačku c) koja glasi:

„c) kada navršši 65 godina života i najmanje 20 godina staža osiguranja ili 40 godina staža osiguranja, nezavisno od godina života“.

Dosadašnja tačka c) postaje tačka d).

Ustavnopravna komisija je jednoglasno usvojila Amandman VI. koji glasi:

Amandman VI.

U Prijedlogu zakona o zaštiti ličnih podataka Bosne i Hercegovine poslije člana 57. predlažem dopunu novim članovima 57a. i 57b. koji glase:

„Član 57a.

(Obrada biometrijskih podataka u svrhu sigurne identifikacije)

(1) Obrada biometrijskih podataka može se provoditi samo ako je propisana zakonom ili ako je nužna za zaštitu lica, imovine, klasificiranih podataka, poslovnih tajni ili za pojedinačnu i sigurnu identifikaciju korisnika usluga, uzimajući u obzir da ne prevladavaju interesi nosioca podataka koji su u suprotnosti s obradom biometrijskih podataka iz ovog člana.

(2) Pravni osnov za obradu biometrijskih podataka nosioca podataka radi sigurne identifikacije korisnika usluga izričita je saglasnost takvog nosioca podataka data u skladu s odredbama ovog zakona.“

Ustavnopravna komisija je jednoglasno usvojila Amandman VII. koji glasi:

Amandman VII.

„57b.

(Obrada biometrijskih podataka u službenim prostorijama)

Dopuštena je obrada biometrijskih podataka zaposlenika u svrhu evidentiranja radnog vremena i radi ulaska i izlaska iz službenih prostorija, ako je propisano zakonom ili ako se takva obrada provodi kao alternativa drugom rješenju za evidentiranje radnog vremena ili ulaska i izlaska iz službenih prostorija, uz uslov da je zaposlenik dao izričitu saglasnost za takvu obradu biometrijskih podataka u skladu s odredbama ovog zakona.“

Nakon obavljene rasprave i glasanja o amadmanima koje je podnio Šefik Džaferović, delegat Želimir Nešković obrazložio je četiri amadmana koja je podnio zajedno s delegatom Nenadom Vukovićem.

Predsjedavajuća Ustavnopravne komisije predložila je da se objedini glasanje, s obzirom da je riječ o identičnim amadmanima koji su već usvojeni u Predstavničkom domu Parlamentarne skupštine BiH. Prijedlog je jednoglasno prihvaćen.

Ustavnopravna komisija je, s pet glasova „za“, bez glasova „protiv“ i jednim glasom „suzdržan“, usvojila četiri amandmana koja su zajednički podnijeli delegati Želimir Nešković i Nenad Vuković, a koji glase:

Amandman I.

U članu 8. (Zakonitost obrade ličnog podatka) stav (2) mijenja se i glasi:

„(2) Pravni osnov za obradu ličnog podatka iz stava (1) tač. c) i e) ovog člana utvrđuje se zakonima institucija BiH, entiteta i kantona, u skladu s nadležnostima, tako da se preciznije propišu posebni uslovi za obradu te druge mjere za osiguravanje zakonite i pravične obrade, između ostalog i za druge posebne obrade, kako je to predviđeno u Poglavlju V. ovog zakona.“

U članu 8. (Zakonitost obrade ličnog podatka) u stavu (3) iza riječi: „Posebnim zakonima za obradu podatka iz stava (1) tač. c) i e) ovog člana“ dodaju se riječi: „institucija BiH, entiteta i kantona, u skladu s nadležnostima,“.

Amandman II.

U članu 33. (Saradnja s Agencijom) ispred riječi „zahtjev“ dodaju se riječi: „obrazložen i na osnovu zakona opravdan“.

Amandman III.

U članu 82. (Saradnja nadležnog organa i obrađivača s Agencijom) ispred riječi „zahtjev“ dodaju se riječi: „obrazložen i na osnovu zakona opravdan“.

Amandman IV.

U članu 99. (Uslovi za imenovanje, privremena suspenzija i razrješenje direktora i zamjenika direktora) u stavu (3) tačka b) mijenja se i glasi:

„b) da je državljanin Bosne i Hercegovine (svi državljani Federacije BiH, Republike Srpske i Brčko Distrikta su državljani BiH)“.

Nakon obavljenog glasanja o navedenim amandmanima, uslijedila je rasprava i glasanje o amandmanima koje je podnio Kemal Ademović.

U raspravi su učestvovali: Sredoje Nović, Marina Pendeš, Dragoljub Reljić i Almir Kardaš.

Ustavnopravna komisija je, s pet glasova „za“, bez glasova „protiv“ i jednim glasom „suzdržan“, usvojila svih pet amandmana koje je podnio delegat Kemal Ademović, a koji glase:

Amandman I.

Naziv dijela Zakona: „DIO TREĆI – OBRADA LIČNOG PODATKA OD NADLEŽNOG ORGANA KAO KONTROLORA PODATAKA“ mijenja se i glasi:

„DIO TREĆI – OBRADA LIČNOG PODATKA OD NADLEŽNOG ORGANA KAO KONTROLORA PODATAKA U SVRHU SPREČAVANJA, ISTRAGE I OTKRIVANJA KRIVIČNIH DJELA ILI GONJENJA POČINILACA KRIVIČNIH DJELA, IZVRŠAVANJE KRIVIČNIH SANKCIJA, UKLJUČUJUĆI ZAŠTITU OD PRIJETNJI JAVNOJ SIGURNOSTI I NJIHOVO SPREČAVANJE“.

Amandman II.

U članu 97. (Nezavisnost Agencije) stav (6) mijenja se i glasi:

„(6) Pravilnik o unutrašnjoj organizaciji Agencije, na prijedlog direktora Agencije, odobrava Parlamentarna skupština Bosne i Hercegovine.“

Stav (7) ovog člana mijenja se i glasi:

„(7) Agencija, u skladu s odredbama Zakona o finansiranju institucija Bosne i Hercegovine, priprema nacrt godišnjeg budžeta i dostavlja ga parlamentarnoj komisiji na odobravanje. Agencija, nakon dobivanja odobrenja parlamentarne komisije, u skladu s rokovima propisanim odredbama Zakona o finansiranju institucija Bosne i Hercegovine, dostavlja Ministarstvu finansija i trezora Bosne i Hercegovine nacrt budžeta radi uvrštavanja u budžet institucija Bosne i Hercegovine i međunarodnih obaveza Bosne i Hercegovine. Ministarstvo finansija i trezora Bosne i Hercegovine, Vijeće ministara Bosne i Hercegovine i Predsjedništvo Bosne i Hercegovine mogu dati mišljenje o nacrtu budžeta Agencije, bez mogućnosti izmjene nacrta budžeta koji je prethodno odobrila parlamentarna komisija.“

Amandman III.

U članu 108. (Prava na pritužbu Agenciji) u stavu (1) riječ „vansudska“ zamjenjuje se riječju „sudska“.

Amandman IV.

U članu 110. (Pravo na djelotvorno pravno sredstvo protiv kontrolora podataka ili obrađivača) stav (1) mijenja se i glasi:

„(1) Nosioc podataka ima pravo na sudsku zaštitu protiv kontrolora podataka ili obrađivača ako smatra da su zbog obrade ličnih podataka prekršena njegova prava iz ovog zakona, ne dovodeći u pitanje druga upravna ili vansudska pravna sredstva, uključujući pravo na podnošenje pritužbe Agenciji iz člana 108. stav (1) ovog zakona.“

Amandman V.

U članu 113. (Opći uslovi za izricanje novčane kazne) u stavu (4) između oznake valute „KM“ i riječi „kaznjava“ dodaje se tekst: „ili u slučaju preduzetnika do 2% ukupnog godišnjeg prometa na svjetskom nivou za prethodnu finansijsku godinu, zavisno od toga koji je iznos viši“.

U stavu (5) ovog člana između oznake valute „KM“ i riječi „kazniti“ dodaje se tekst: „ili u slučaju preduzetnika do 4% ukupnog godišnjeg prometa na svjetskom nivou za prethodnu finansijsku godinu, zavisno od toga koji je iznos viši“.

U stavu (6) na kraju teksta interpunkcijski znak tačka zamjenjuje se interpunkcijskim znakom zarez i dodaje se tekst: „ili u slučaju preduzetnika do 4% ukupnog godišnjeg prometa na svjetskom nivou za prethodnu finansijsku godinu, zavisno od toga koji je iznos viši“.

Nakon toga, Ustavnopravna komisija je, s pet glasova „za“, bez glasova „protiv“ i jednim glasom „suzdržan“

- usvojila Prijedlog zakona o zaštiti ličnih podataka zajedno sa usvojenim amandmanima i predlaže Domu naroda njegovo usvajanje zajedno sa usvojenim amandmanima.

Sjednica Ustavnopravne komisije završena je u 15 sati.

**SEKRETAR
USTAVNOPRAVNE KOMISIJE**

Almir Kardaš

**PREDSJEDAVAJUĆA
USTAVNOPRAVNE KOMISIJE**

Marina Pendeš